

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 481220 25 St
Tuzla, 08.07.2025. godine

OPĆINSKI SUD U TUZLI, sudija Vedran Milašinović razmatrajući prijedlog predlagača stečajnog dužnika „COMMO ELECTRONIC“ d.o.o. za proizvodnju, promet i usluge Tuzla, ul. Ismeta Mujezinovića 5, van ročišta donio je dana 08.07.2025. godine sljedeće:

R J E Š E N J E

JAVNO SE POZIVAJU predlagač, povjerioci i sva zainteresovana lica da u roku od 30 (trideset) dana od dana objavljivanja rješenja u Službenim novinama F BiH predlože otvaranje stečajnog postupka i na žiro-račun Suda, broj: 132-100-03091233-91 NLB banka dd Sarajevo, predujme iznos od 2.220,00 KM (dvijehiljadedvije stotinedvadesetkonvertibilnihmaraka), na ime obezbjeđenja troškova stečajnog postupka, te da dokaz o izvršenoj uplati dostave sudu pozivom na broj predmeta.

Ukoliko stečajni dužnik kao predlagač ili neko od zainteresovanih lica ne uplati navedeni iznos predujma u ostavljenom roku uz dostavu dokaza o uplati sudu pozivom na broj predmeta, sud će o prijedlogu za otvaranje stečajnog postupka odlučiti u skladu sa odredbama Zakona o stečaju.

Rješenje će biti objavljeno u Službenim novinama F BiH, web stranci suda i oglasnoj ploči suda.

O b r a z l o ž e n j e

Sud je dana 17.04.2025. godine pokrenuo prethodni postupak radi utvrđivanja uslova za otvaranje stečajnog postupka nad imovinom privrednog društva „COMMO ELECTRONIC“ d.o.o. za proizvodnju, promet i usluge Tuzla, ul. Ismeta Mujezinovića 5, a za privremenog stečajnog upravnika imenovana je Mevlida Šećerović iz Tuzle. Dana 09.05.2025. godine privremeni stečajni upravnik je dostavio izvještaj o provedenom prethodnom postupku.

Iz izvještaja privremenog stečajnog upravnika i navoda datih na ročištu proizilazi da je društvo prestalo sa obavljanjem djelatnosti 2003. godine, a da je platežna nesposobnost nastupila 2009. godine kada je ugašen bankovni račun društva. Društvo ima dugovanja prema PU F BiH u iznosu od 45.754,96 KM što proizilazi iz uvjerenja PU F BiH na dan 06.05.2025. godine. U finansijskim izvještajima na dan 31.12.2024. godine je iskazano stanje obaveza u ukupnom iznosu od 99.106,00 KM s tim da bi se tačno stanje obaveza moglo utvrditi samo na osnovu prijave potraživanja u slučaju otvaranja stečajnog postupka. Društvo u svom vlasništvu nema nekretnina što je utvrđeno uvidom u javne evidencije o nepokretnostima, nema motornih vozila što proizilazi iz uvjerenja MUP-a niti bilo kakve druge pokretne imovine, niti ostale imovine iz čije vrijednosti bi bilo moguće namiriti troškove postupka i potraživanja povjerilaca.

Stečajni dužnik a što proizilazi iz izvještaja i mišljenja privremenog stečajnog upravnika nije u roku od 60 dana od dana nastupanja platežne nesposobnosti podnio prijedlog za otvaranje stečajnog postupka (prijedlog podnesen 03.03.2025. godine, a bankovni račun ugašen 2009. godine).

Ispitujući prijedlog za pokretanje stečajnog postupka sud je utvrdio da je prijedlog za otvaranje stečajnog postupka dopušten i osnovan obzirom da je stečajni dužnik platežno nesposoban.

Cijeneći da su ispunjeni uslovi za otvaranje stečajnog postupka, a nakon provedenog prethodnog postupka i dostavljenog izvještaja privremenog stečajnog upravnika, te da je utvrđeno da stečajni dužnik nema imovine za podmirenje obaveza, sud je u smislu odredbe čl. 102 stav 7. Zakona o

stečaju pozvao dužnika, povjerioci i sva zainteresovana lica da izvrši uplatu troškova finansiranja stečajnog postupka u visini od 2.220,00 KM iz kojih sredstava će biti finansirani svi troškovi stečajnog postupka (nagrada i naknada stečajnom upravniku, objavljivanje rješenja u službenim novinama, izrada pečata za društvo u stečaju, podnošenja finasijskih izvještaja nadležnim institucijama sve do postupka brisanja društva dužnika iz sudskog registra privrednih društava, procjena imovine odstrane ovlaštenih vještaka, objava oglasa za unovčenje imovine i drugo), obzirom da prema prijavi privremenog stečajnog upravnika društvo ne posjeduje imovinu.

Ukoliko predlagač, povjerioci ili neko od zainteresovanih lica u ostavljenom roku ne predlože otvaranje stečajnog postupka i izvrše uplatu predujma troškova za vođenje stečajnog postupka, sud će otvoriti stečajni postupak i odmah ga zaključiti u skladu sa odredbama člana 102.stav 8. Zakona o stečaju.

Odluka o dostavi rješenja i javnom oglašavanju putem oglasne ploče suda, WEB stranice Općinskog suda u Tuzli i javnog objavljivanja u Sl. Novina F BiH, zasniva se na odredbi člana 103. stav 8. Zakona o stečaju.

SUDIJA
Vedran Milašinović

POUKA O PRAVNOM LIJEKU: Protiv ovog rješenja nije dozvoljena žalba.